

四庫全書

集部

欽定四庫全書

集部

乾坤清氣卷十一

詳校官中書

臣丁榮祚

助教臣常循覆勘

覆校官中書

臣方大川

校對官中書

臣葉葵

謄錄監生

臣馬紹基

欽定四庫全書

乾坤清氣卷十一

明 偶桓 編

五言絕句

錄汴梁宮人語

楊奐煥然

一入深宮裏經今十五年長因批帖子呼到御床前
歲歲逢元夜金蛾鬧簇巾見人心自怯終是女兒身
殿前輪直罷偷去賭金釵怕見黃昏月殷勤上玉堦

翠翹珠襦臂小殿夜藏鈎幕地羊車至低頭笑不休
人間多棗栗不到九重天長被黃衫吏花攤月賜錢

宣和墨竹寒雀

虞集伯生

洒墨寫琅玕深宮春晝閒蕭條數枝雪不似紇干山

上馬

眼昏身手鈍上馬怕風沙祇好扶藜杖循籬看菊花

黃筌畫紅蕉十二紅

柯九思敬仲

故國三千里名禽十二紅白頭供奉在揮淚濕東風

題汲水美人圖

汲水立銀床照見紅妝影
王孫殊未歸寶釧霜花冷

題綠竹

江南撥鐙法寂寞冷天涯
阿誰春雨後貌得翠蛾眉

題王節婦卷

王沂師魯

夫亡姑已塋二子幸成人
甚日歸泉下還夫薄命身

題扇上著色竹

陳旅衆仲

江上竹枝歌為君顰兩蛾
秋風團扇底零落黛痕多

倪元鎮雨竹

落日楚江深
鷓鴣啼遠林
相思不可見
池上寫春陰

題顧周道濯足圖

潘純子素

脫屣白石上
濯足清泉中
悠然天際想
木末生微風

飲酒

丁復仲容

北關諸公貴
東門幾客還
撇來缸面酒
攜上屋頭山

贈孟通

孟通朔方彦
領薦過昇州
花發瓊林苑
題詩向石

頭

杏花鵝

郭翼義仲

溪上好鵝賓相呼雪一羣柳根春水煖來泛杏花
雲

秋風濯足圖

荊棘銅駝陌桑田碧海波秋風歌濯足歸去白雲
多

絕句

山根秋水落江樹與舡清遮莫歸來晚東頭月未
生

陽春曲

柳色青堪把櫻花雪未乾宮中裁白苧猶怯剪刀
寒

松下釣魚圖

鄭東季明

皎皎月在樹泠泠風滿衣欲問三江口長歌遂不
歸

五言律詩

恒山樓

劉因夢吉

萬嶺尊恒岳遺臺枕後潭
仰高慚對坐哭險負奇探
影落滄溟北雲開斗柄南
山靈怜野客今夕費烟嵐

登武陽城

朝遊樊子館晚上武陽城
潮接滄溟近山連碣石生
斷虹雲淡白返照雨疎明
日暮悲吟處樵歌已慘情

趙氏南庄

許衡仲平

晚起北窗涼清談戢羽觴入簾花影重落地燕泥香夢裏青山好吟邊白日長秋風載書籍相對築茅堂

輿病高崖道中作

姚燧端甫

役役乾坤遠栖栖道路頻五年三入蜀十夢九歸秦瘡鬼偏凌客山英定笑人無勞問前渡祇覺白頭新

舟達黃溪

草木隨寒暑殊方榮悴同葦花兼露白檉葉未霜紅日月雙飛鳥江湖一病翁晚來沙嶼上愁坐獨書空

發舟青神縣

青神開百丈江岸轉荒涼
薜荔懸松起蕙葭並竹長
深披豺虎徑毒犯虺蛇鄉
何莫非王事牽夫可惋傷

發源縣齋書事

盧摯處道

竹樹映清曉坐聞山鳥鳴
瓶花香病骨簷雨挾詩聲
客亦非餘子春無負此生
明朝予問俗吟罷却須晴

書梓山寺經室

問俗來山谷攜春到竹溪
花香破禪寂林樾受鶯啼
欲

和觀音偈聊乘醉墨題閒雲若留客不肯為余栖

青華觀西軒

琳宇夏天曉官曹今日閒
深松欲無路疎竹不遮山
靜對黃冠語時看白鳥還
平生林壑趣聊復此窗閒

少林寺贈達禪師

古剎東風裏逢僧一解顏
收經出深竹披衲下空山
未要天花墜聊看石影閒
何妨病居士明日到田間

岳陽樓待渡

高克恭彥敬

楚水凝千里湘雲隔萬層城高秋浦月星雜夜船燈旅
況天誰管年光雁可憑殷勤淡山色相送過巴陵

泊舟湘岸

長沙今在眼青草舊知名二月風檣疾三湘雪浪平藤
深帝子廟花發定王城莫艤江南岸啼鵲處處聲

贈永清曹縣尹

趙孟頫子昂

赤縣郎官宰清朝學士班雲端雙履冷花裏一琴閒鴻
鵠宜天路麒麟近帝關會當從此召豈待及瓜還

送李清甫御史出按四川

蜀道青天上繡衣
驄馬行霜威御史府
春色錦官城萬里
平安報三年菽水清
相逢一杯酒似為別離情

次袁學士上都集韻

金城雨露遘河漢
歷中天玉殿散青靄
瓊樓飄紫烟闕山
誠險固宗社自綿延
世祖龍飛地皇綱億萬年
曉日夾雲樹春風吹雪山
飛鷹玄兔磧飲馬白狼灣
寶帶吳鉤迥金矛漢節閑
將軍萬里外不怕二毛斑

贈黃秋江處士

李孟道復

君釣秋江月我耕秋谷雲逃名君笑我伴食我慙君老
我素多病壯君高出羣何時各歸去雲月兩平分

偶成

日午山中道停驂進步難
鰾侵苔徑滑風入毳袍寒
匡國終無補全身尚未安
一尊茅店酒強飲不成歡

寄東宮

艱危勤扈從俯仰盡周旋
小試屠龍技翻成抱虎眠
脫

釣魚縱壑漏網鳥冲天萬事從今始灰心未死前
十年陪顧問一旦決安危自合成功去應慚識事遲長
城徒自壞孤注莫相疑辟穀求仙者高名百世師

送張尚德

虞集伯生

六月初聞雨官河潦水生江南歸宋玉樓下謝荀卿鵬
鴉青霄迥兼葭白露盈都留詩興在來聽上林鶯

明皇按樂圖

新度霓裳曲三年教有成驚鴻渾不下飛燕若為輕芍

藥春亭莫芙蓉野水生梨園多白髮吹笛到天明

送長沙守

白髮長沙守循良又好文近辭金馬去遠有玉魚分對
竹聽湘雨開簾看岳雲漢廷思賈誼一飯莫忘君

贈楊友直

雒陽楊友直字擬漢中郎畫若錐穿石垂如雨溜牆舞
花羞女美醉草笑僧狂昨日鴻都學煩君寫數行

錢舜舉畫

一樹花如雪清明客未歸坐看黃鳥竝夢作綵雲飛翠
袖寒猶薄羊車過絕稀相如能作賦月下卷春衣

寄段惟德竈副

持節雙溪上寒梅照鬢華臨風懷鳳閣見月憶龍沙夜
訪山陰竹晨飡海上瓜自嗟留滯久欲斷使君車

畫檜

茅山多古樹此檜更長生鸛鶴栖來穩蛟龍化得成雲
深還近戶月落似聞笙千載如相見蒼然故舊情

八月八日有感書視草堂壁

載筆趨芸閣探囊索緼袍坐銷秋日靜心折夜風高識
字頭先白謀生計轉勞文園多病渴常想賜葡萄

汪道士草亭

飛白妙娉婷新題照草亭仙遺相鶴法客借換鵝經霧
雨歸縣黍風雲護茯苓遙知春晝永深坐讀黃庭

送魯子翬廉使之漢中

封上頌臺禮輕車入漢中節毛吹渭雨木葉動秦風把

酒臺基古馳書歲事豐朝回倚西閣日日數歸鴻

送朱潛虛之廣東照磨

聖主多清暇臨池愛日長天章垂鳳彩雲氣動龍香進
諫慙簪筆爭書散近床承恩君最早服玉向炎方

寄薩天錫進士

江上新詩好亦知公事閒投壺深竹裏繫馬古松間夜
月多臨海秋風或在山玉堂蕭爽地思爾珮珊珊

答榮存初參議秋夜見寄

寄館城門夕高秋雨露開天垂華蓋近月轉紫垣來疎
闊思良會淹留到不才深期謝安石揮塵散風埃

晚過孔奉章舍下

范梈德機

滄江一萬里書信近如何向暮客懷薄及秋鄉夢多故
人相慰藉竝舍數經過但願長無事彤庭接珮珂

哀文集賢時奉使南海道卒

瘴海距天闕道踰千萬山空傳靈雨送不見使星還旌
旆青楓暗樓臺白水間郡人唯我最遠客淚潺潺

京下思歸

黃落薊門秋飄飄在遠遊不眠聞戍鼓多病憶歸舟
甘雨從昏過繁星達曙流鄉無徐孺子萬口薄南州

貴州

離思久不愜幽情晚更添天宜明月獨山與客雲兼蛩
語通支柱蛛絲映捲簾若無光霽在何以破朱炎

通潮閣

候館駐征騎西風獨夜清閉門聞葉落倚杖看潮生有

禮齊蠻俗無歌學楚聲淒涼蘇季子行處足高名

送鄧慶長從宦吳中

聞說吳中郡青山萬疊開雲霞通井邑水木映樓臺子
去嗟何恨吾生念却迴辛勤官下養書寄合頻來

答李宗明

采江莫采蘋思食莫思蓴間歲曾為客經時獨夢人林
園花動夕帷帳草留春萬里燕山路空懷涕泗頻

客居惟所適不是遠時人聞喜池臺僻來依第宅新月

涵鍾警夕風引釀生春頗得過從樂相看莫厭頻

酬王繼學大參

久客歲云暮悠悠念異鄉病因詩暫愈愁為酒先降屋
隱疎簾半城依老樹雙晨朝有好鳥命我隔東窗

寄邵允文

馬祖常伯庸

故友經年別如今髮白無清秋江鷺浴長夏野猿呼客
舍栖書冊齋厨具筍蒲知賢不能薦羞澀望東吳

南征

久雨關河濕今朝日始晴浮舡下夜瀨覓酒近春城鵝
鴨將雛出牛羊傍母行獨怜無侶客萬里又南征

石田山居

甲子人愁雨河田麥已丹歲凶捐瘠衆天遠禱祠難賈
客還沽酒王孫自飽食更怜黧面黑征戍出桑乾
四月淮天雨清林蔭碧池筍香隣甕酒禽聽客窗棋田
鼓春迎社鄉巫夜賽祠漸知飄泊久自覺是農師

郎中蘇公哀挽

墓門翁仲泣秋草九原深身世書盈屋鄉園樹滿林故
人多執紼令子早冠簪曾作陽關曲今成薤露吟

羅學士奉旨南祀海岳繇鍾陵相別聞尚宿留

會稽有懷奉寄

揭傒斯曼碩

鍾陵一分手幾日過錢塘五月山陰路千峰海上涼烟
霞含景氣草木識天香夙昔經行處風流轉不忘

題祝道士龍虎山先天觀圖

聞說先天觀重重絕壁環烏啼青澗裏花落白雲間樵

子能長嘯居人識大還洞門無處認唯有水潺湲

黃尊師高軒觀鵝因留宿

開軒南岳下世事未曾聞落葉常疑雨方池半是雲偶
尋騎鶴侶來此看鵝羣一夜潺湲裏秋光得細分

送人之淮東

扁舟何處客此去飽經過彭蠡江聲合揚州月色多天
低知近海地濶欲橫河自是吾生拙如君定若何

廬阜聞鐘

廬山三百寺何處扣層雲宿鳥月中起歸人湖上聞入
空應更迥近瀑正難分遙想諸僧定香爐上夕熏

送蘇尊師歸茅山

華陽隱居者聞復有蘇仙時向梅花下高枕石頭眠
匣出飛電琴心流暗泉閒來京闕下夜夜夢雲邊

送張漢英之廣西憲幕

候雁幾時到送君今遠遊三湘秋欲老五嶺瘴全收
隨俗調眠食乘時力進脩賢侯開幕府萬一子能留

懷沆姪

蕪蕪黃桑葉蒼蒼白竹峰居人爭野碓歸客背林鐘路
暗綠溪濕山寒著霧濃阿咸收稻未辛苦缺相從

象石

王士熙繼學

老石何年有江頭閱歲華蜿蜒龍吸水突兀象蹲沙地
軸資神禹天工付女媧歸來銀漢客好與共空槎

寄友人劉師魯

楊載仲弘

聞君遊宦處正值洞庭湖落日波濤壯晴天島嶼孤舟

帆通漢沔風物覽衡巫天下文章獎非公孰起予

渡江寄俞仲連

舟濟大江濱中流日欲曛
鹵翻沙際雪潮落渡頭雲
鯨躍常知候鴻飛不亂羣
頗思論勝槩把酒莫如君

和孟東野題崑山寺

蘭若負崑崗鑿崖安佛床
梯雲石磴滑入厨泉水香
旦寒鳥相聚月黑龍放光
舟行苦局促幸憇殊勝場

酬子行初秋風颶之變

暮夜風濤變崩騰怒不休魚龍皆失穴江海欲同流竝
岸漂千舍連檣覆萬艘陰陽知有沴惻愴動深憂

奉題伯父雙峰樵隱

山出雙峰秀溪流一派清土風存禮讓人事省將迎路
逐高低過田隨早晚耕家林有如此南望每關情

童穉離桑梓猶能憶故山雲峯垂白脚蘚石露蒼顏插
架詩書富應門禮義閒綠林遺我恨回首淚闌珊

石樹盤根瘦沙溪激浪清竹間看犢卧木末見人行檣

事常分力樵歌輒和聲從來攜杖處不礙白雲生
山曲兩三家相過路不賒對門開竹徑臨水種梅花酒
熟留人醉詩成任客誇時時談舊事相看鬢垂華

蠹簡

往古韋編在何年始汗青蠹蟲深卜宅蝌蚪不成形泯
滅沾秦火搜羅出漢廷斯文天未喪不敢望全經

敗裘

寂寞牛衣子能無敝緼袍塵埃須浣濯蟣虱費爬搔意

味存鷄肋寒涼視馬毛千金既銷鑠猶聽朔風號

送葉彥中之官行臺

范滂將攬轡周景已題輿九扈名兼美三鱣兆豈虛都
門愁摻袂江徼喜沿書重有斑衣奉南州摠不如

送張宣撫使嶺南

奉使入蠻烟終軍始妙年抗旌辭朔野擊節渡湘川翠
竹侵岩際黃茅盡海邊狼荒非善地為戒莫留連

送孫大方歸朝元宮

飛構上凌空依稀想故宮金盤凝曉露玉珮振秋風
溱那違俗支離更蒼蒙大還何日就變化入無窮

送胡汲古之吳中

有客佩蒼精居然得此生山開栖越跡水汭入吳程
俠老悠悠計傷離戀戀情食菲方未已應不為魚羹

送王元禮歸平城

牧羊怜馬援投筆困班生侯印終兼綰窮愁實飽更
大材當用世小拙亦知名快飲桑乾酒能澆氣不平

酬張宣撫

瀛海無消息冥冥道路長已驚雙鬢短更待兩瞳方落
日依平嶂洪河入大荒憂來那可得揮涕欲沾裳

和袁集賢上都雜詠

柳貫道傳

出塞行瞻日趨朝喜近天離宮開苑囿馳道絕風烟瑤
水巡非遠峒山歷更綿甘泉多法從獻賦憶當年

雨水漸衣黑雲沙際目黃烟開纔黯淡日出已蒼涼徇
俗高簷帽清心小篆香端居萬里念蕙草惜微芳

謠俗隨方異溝途隔舍迷
醺人唯馬湏勸客有馳蹄
殿角孤花靚城隅雜樹低
天涯中夜舞如意昔曾攜
天潢猶白白雲幙故青青
積潦推車軸高風墮箭翎
宮塗丹赭堊殿戶紫金釘
女樂蓬萊秘哀簫動杳冥
幄殿層雲陣轅門積雪峰
奇鷹皆戴角御馬盡飛龍
瀚海將臨幸云亭望陟封
青丘大羽獵有事待玄冬

乾坤清氣卷十一

欽定四庫全書

乾坤清氣卷十二

明 偶桓 編

五言律詩

鄢陵經進士李伯昭墓
雅勒呼正卿

激烈山陽笛淒涼祖逖鞭才高天不惜命薄世空怜故
里一丘土荒城五畝田雖云有宿草寧忍不潸然

雲溪真館

真館雲溪上孤高逼太清江山環几席星斗拂簷楹樹
古成龍去篁疎作鳳鳴仙遊始可接我欲謝塵纓

送趙宗古編修代祀西岳

北上函香去西南致禮勤蜀山千丈雪秦嶺萬重雲驛
騎鳴金勒宮袍粲錦文白頭抱關吏自羨識終軍

送李唐卿御史

黃潛晉卿

去去紅塵外秋風滿華嵩故鄉歸衣錦行路避乘驄未
覺長安遠真成冀北空燕山一枝桂回首正西風

含香道中

殘日亭猶遠輕風帽易斜
稻畦低沒鶴草徑曲行蛇
經世知無策謀生會有涯
殷勤理黃菊留眼待秋花

陪仁父存博登石頭城

談笑逢諸老登臨失故亭
薄遊成汗漫高步覺嶙峋
江近通淮碧山遙失楚青
平生一盃酒及此慰飄零

送達兼善僉憲河南

王沂師魯

袖有新封事囊無舊賜金
兔園司馬賦魏闕子牟心
秋

菊誰同采燕鴻好寄音故人如問我為誦白頭吟

送蕭九齡赴淮西

漢將傳華胄蘇卿弊黑貂曳裾非我事置醴遠相招楚
甸春多草淮流日兩潮空吟小山賦叢桂影蕭蕭

越上早行

青鞋三十里草露惹衣斑潮落曹娥渡雲昏夏禹山秋
聲黃葉裏天影白鷗間欲問錢塘路漁家半掩關

瓜洲

烟際繫孤舟
蘆花滿擢秋
江空雙雁落
天濶一星流
急鼓西津渡
殘燈北固樓
商人茅屋下
沽酒話揚州

金陵

六代帝王州
宮烟滿石頭
星河天北轉
江漢水東流
步絕金蓮雨
歌殘玉樹秋
白頭有漁者
猶說景陽樓

度三花嶺

絕壁三千丈
荒烟八九家
黃茅青草瘴
黑質白章蛇
橄欖高懸子
芭蕉倒吐花
嶺南一回首
何處是京華

杭州

汪元量水雲

有客腸迴九無人髮握三關中新約法江左舊清談
鐵騎來天北樓舡過海南一枝巢越鳥八繭熟吳蠶

天也今如此人乎可奈何臺邊西子去宮裏北人過
玉樹歌方息金銅淚已多旌旗遮御路舟楫滿官河

送項鍊師還天台

陳旅衆仲

不學東方朔歸尋馬子微人間無藥賣海上有雲飛
谷暖金鵝大溪深土鴨肥當年種桃樹高過石樓扉

張書巢畫圖

萬里青城叟歸尋江上山瀑喧春雨過汀暗暮雲還駐
馬白沙曲懷人綠樹間薊門有巢父幽興最相關

青漳黃氏北別墅

聞說黃家墅開門入翠嵐細岑依舍北流水出城南雨
煖蘭抽笋霜晴樹落柑千年讀書地更莫乞羊曇

送謝仲連小鹿巡檢

小鹿謝將軍前朝宰相孫故家已為庶今代得承恩笏

鼓鳴沙月旌旗樹海暎送行車幾兩回首躍龍門

史局懷柯監書

方積叔高

每日明光殿傳宣看畫圖姓名呼我寫識監古人無賈
傳俄辭漢張生竟入吳遂令風雨夜長憶在江湖
想君滄海上夜夜夢皇州母子三十里君王一萬秋修
書期力盡報國入神遊賴有年光識青春照白頭

閣下鈔書作

待漏趨青閣移書近紫霞竹光翻野草硯影落宮花學

士春承宴中官晚進茶君王思四海朝退欲棲鴉

送友還家

台哈布哈兼善

君向天台去煩君過我廬可於山下問只在水邊居門外梅應老窗前竹已疎寄聲諸弟姪老健莫愁予

賦得上林鶯送張兵曹二首

春陰花樹合日出見黃鸝圓聲度繁木流羽拂高枝時節苦易換况經多別離君子貴求友勿懷幽谷悲

春日陽關道鶯聲滿上林來從金谷曉飛度玉樓陰柳

嫩難分色歌停稍辨音明朝空解語人去落花深

秋雨夜坐

甘立允從

風雨夜窗急庭幃秋思多蕭蕭聞落木洶洶度驚波
濕吟蛩亂簷深宿鳥過青燈挑不盡無奈客愁何

七夕

傅若金與礪

耿耿玉京夜迢迢銀漢流影斜烏鵲樹光隱鳳凰樓
雲錦虛張月星房冷閉秋遙怜天帝子辛苦會牽牛

即事

目斷虞淵日心傷魏闢秋霍光元在漢周勃固安劉廟
社多佳氣公卿足遠猷宸居終不改羈旅莫深憂

詰陳宗道酒不至淹留高劉諸公坐

酒許今晨送燈從昨夜花遣人聽繫馬留客過栖鴉高
適邀同坐劉伶興轉賒不成投轄飲悵望隔風沙

賦得天際舟送張孟功治河

日下行人發春晨去鷁催纜侵斜月解帆向斷雲開度
鳥窺詩卷垂虹映酒杯尋源不可近奉使幾時回

隱居圖

聞說幽栖處遙連郁木天
徑開移竹地渠引灌花泉
座客留傾釀隣人訪草玄
京華遠遊子那得共盤旋

柳先生祠

江抱零陵郡山藏鉛鋁潭
古人如水去祠樹與天參
述作籠諸子風騷迫二南
後來竊時譽吾輩得無慚

六月二十八日至京

使節違雙闕天書下百蠻
雨蒸歸日路雲合去時山
嶺

表兵猶動灤陽駕未還
安邊數策在不得犯龍顏

仰山寺

張_缺蒲澗

僅一袈裟地師今第幾
傳寺當初建日國是太平
年風起山如湧佛間花自妍
早遊天竺勝晚及四藤禪

江樓

蕭_缺周遠

憑闌聊望遠天外白雲飛
江靜沙留月樓高風動扉
山川入夜濶鼓角出城微
又報鄉村警兵戈未解圍

寺橋

古刹傳清楚橫橋雨歇時年華流水去春事落花知宇
宙遺陳跡江山本後期向來多薄命今日信枯藜

顏子中池亭

劉聞文廷

池淨天容湛窗虛水氣通遠山來戶外飛雨洒亭中薜
荔含朝景蕙葭集晚風平生江海念相對與無窮
種樹年年長開窗面面涼雨苔生砌綠秋葉墮池黃得
句閒拈筆拋書懶近床旅懷隨所至誰復計行藏

蠟燭

高缺孤雲

取質蜂甜後融春火力深直中元有骨明處本無心花
吐燒空日龍盤照夜金剪殘更漏永樓月度高林

寄李道復平章

郝缺新齋

聖主尊賢輔明時仗老臣策勲分二陝錫土列三秦邊
微風塵息乾坤雨露均遙知黃閣下得句更清新

憶王成之

高缺志翔

北望烟雲隔東風草又深身安輕客路書到重鄉心自
許寧論晚相知遂有今平生種桃李幾樹不成陰

送石民瞻過吳江訪友

薩都拉天錫

老友吳江去吳江水正高一尊斫鱸膾四月過櫻桃矍鑠綠玉杖風流白苧袍西窗故人夜應是對揮毫

和虞伯生見寄韻

白鬢眉山老玉堂清畫間聲名滿天下翰墨落人間才俊賈太傅行高元魯山獨怜江海客尊酒夜闌珊

投宿龍潭道林寺

倦遊借禪榻客意稍從容落日江舡鼓孤燈野寺鐘竹

雞啼雨過山白帶雲春半夜波濤作長潭起卧龍

鳳凰臺望祭鄭復初錄事

已矣鄭錄事功名與願違
鬚翹如挿戟體弱不勝衣
白日長江去青山何處歸
崇臺三酌酒目斷雁南飛

夜宿昇龍觀

舊日宸遊地球簾護輦紋龍
飛九天雨鶴夢一龕雲
神火丹砂見仙音
客枕聞殷勤謝道士
深夜禮茅君

秋日雨中登石頭城訪珪白岩不遇

石頭城上去紅葉雨紛紛半日不見路四山都是雲魚
龍隨水上鐘磬滿江聞遙憶南庄叟天寒補衲裙

鹿角站阻風

楊缺信可

風送洞庭沙維舟隱荻花水枯魚上罾秋老燕移家日
暮長河急天寒去路賒故鄉三十驛歸夢繞天涯

送泗州同知僕世南赴任

郭缺君彥

夢喜三刀驗之官正少年龍纒倚天劒虹繞載春舡淮
泗名先振湘潭政可傳門闌多喜氣屢見出英賢

錦衣臨泗水仙境足吟哦烟樹連淮遠雲山入楚多濟
川功不小經世意如何會見沙堤上春風響玉珂

西山道院

幽居絕瀟灑深院鹿成羣山色開窗得泉聲隔竹聞猿
啼臨水樹風送渡溪雲客至渾無事談詩到夜分

贈方外閑人

貢師泰泰甫

白日青天外壺中別有春江湖萬里客宇宙一閑人采
藥雲歸袖看花月滿身何時重會面醉拂布袍塵

台州寄楊子秀

路轉千峰合溪通一帶斜飯炊黃渡雪酒染赤城霞未
訪仙人宅先尋博士家近聞歸隱處盡種碧桃花

將干嶺

絕頂低南斗重關壯北門隴雲浮地白谷水帶泥渾宇
宙神功大山河帝業尊小臣叨載筆華髮感深恩

宮中舞隊歌詞

張翥仲舉

十六天魔女分行錦繡圍千花織步障百寶貼仙衣回

雪紛難定行雲不肯歸舞心挑轉急一一欲空飛
鑿海行龍舸憑山起鵠臺天池神馬出月殿舞鸞來六
合妖氛淨羣生壽域開吾皇樂民樂願上萬年盃
白玉琯釵燕黃金鑿步蓮簫吹鳳臺女花獻葢宮仙香
霧圍銀燭歌雲撲錦筵請將供奉曲同賀太平年

禡臺

嬪御親弓韞祠禡有古臺瑤池今寂寞玄鳥自歸來鼎
再移支子星俄圻上台興亡關歷數祇遣後人哀

遊石頭城清凉寺用天錫題壁詩韵

門蘿上絕頂嵐氣濕繽紛日色不到地樹陰渾似雲僧
歸過嶺見樵唱逆風聞更待詩人醉狂書白練裙

大駕時巡千官導送至大口

萬乘巡行遠三靈佑護多旌旄隨大駕鼓鐸襍鳴駝初
日浮黃繖微風送玉珂臣心如草色不斷到灤河

寄雲門僧

聞道耶溪叟高年出寺遲眉毫長幾許布衲破多時挂

錫鶴移樹繡經花滿池相望一江水歲晚赴幽期

發富陽

段天祐吉甫

遠海初曦動長林積霧開山從吳會起潮向富陽回野
飯松毛火村醪樹瘳盃風吹黃葉度偏傍馬鞍來

發嘉興

明發嘉興縣扁舟宜向東天寒待伴雪日暮打頭風遠
寺明霞外孤城練水中等間作離別不擬見歸鴻

夏夜

向夕南風起開窗散鬱蒸
草間車水鼓松下捕魚燈
山聲雲填雪河流月走冰
城樓更五鼓車馬逐晨興

題蘇武牧羊圖

楊維禎廉夫

未入麒麟閣時望帝鄉
寄書元有鴈食雪不離羊
旄盡風霜節心懸日月光
李陵何以別涕淚滿河梁

送吳生良之金陵

五月秦淮去南風水接天
雨晴梅子後人近鳳臺前
雲樹連春驛星河落夜舡
金陵佳麗地遲子廣新篇

送曹生之京

十載辭京國常懷玉笋班鳳麈遊壁水虎豹啟天關
海樹分秦雨江雲隔楚山壯遊須努力況子正紅顏

送李五峰召著作

聖主徵遺逸郎官老謫仙青山藏古史金馬得時賢
吾道推先路恩光照晚年宣文忙視草銀燭賜金蓮

送用上人之京陵

東土帝王州高僧汗漫遊衲衣收夜雨洗鉢度江流
草

發金銀穴花飛霹靂溝
攜詩見短李應下讀書樓

送楊生琰歸溧陽

之子吾同姓相逢已道南
春衣彫白苧佳樹長黃柑
雨

淡潛龍寺天清漂女潭
蒲公讀書處白石有新庵

留侯廟

李孝光季和

感慨留侯廟曾聞客下邳
手扶仁義主身是帝王師
興漢功居最存韓志可悲
如何劫高后反使邠金危

馮秦卿藏書

榮中富貴傳賓客盡能文屬世方橐武無人學解紛劍
成猿接水園合鹿號羣官作清時好長吟坐白雲

送公子趙去疾二首

綿綿萬里道利涉有方舟城郭通吳會江源起益州圖
經開白帝祠祭過黃牛他日浣花老猶能作勝遊
辭吳向三楚送遠指秦川高鴈憂離苦輕鷗不避舡天
青微露下江黑大星懸郢曲長多怨聞歌祇自怜

秋岑

更覺秋岑碧能尋勝日躋樹涼來鶴鶴山斷見虹霓釋
子行相問幽人去不迷雨餘天姥出吾欲涉丹梯

燕粟總管玩芳亭

薛玄曦玄卿

栗氏林亭好飄飄借馬遊藥闌當戶密花逕近城幽未
許朝參懶聊為逸興留使君行樂處風物為春柔

湖寺湧碧泉

張天雨伯雨

喧寂一塵隔湖濱出寶坊荷陰分補衲水氣雜燒香書
勘鳥皮几茵敷白氎床從來已公屋詩客許徜徉

歲暮

忽忽歲云暮徒興白首嗟山留待伴雪春禁隔年花把
卷因遮眼分餽且膠牙自緣身懶墮莫遣送窮車

送張仲鼎遊燕南

釋大訢笑隱

天上知名久由來漢客星江湖歌白雪風露滿青冥巴
蜀須傳檄燕山待勒銘壯夫期遠大不獨抱遺經

次韵甯宣慰

將門三葉貴古劒削霜研霧卷烏蠻淨風生碧海清投

壺驚甲帳飛墨動雲屏未愜清遊興松房聽雨聲

送薩天錫照磨赴燕南憲幕

蕭寺留詩別高懷不負公江聲元自急山勢古來雄下榻疎鐘雨登臺落木風重來無幾日除道避乘驄


答王子長

宋元子虛

病後得書頻情知未立身孤燈風雨夜兩處別離人乙鳥歸來社辛夷開過春如逢元白問莫說為詩貧

銅陵萬松山中

樵聲聞遠林流水隔雲深茅屋在何處桃花無路尋身
黃松上鼠頭白竹間禽應有仙家住避秦來至今



乾坤清氣卷十二

欽定四庫全書

集部

乾坤清氣卷十三

詳校官中書臣丁滌祚

助教臣常循覆勘

覆校官中書臣方大川

校對官中書臣葉 葵

謄錄監生臣馬紹基

欽定四庫全書

乾坤清氣卷十三

明 偶桓 編

五言律詩

過山居

周權衡之

數里榕陰合迢迢過客稀
烟溪桑子熟山雨藥苗肥
窗冷雲侵座琴清月在扉
怡然無俗子我已早忘機

送楊友直赴刑部主事

丁復仲容

少昊煩司幕先生自此升九重趨玉陛一騎發金陵邊
靜龍堆月河清馬頰冰徒慙太平日江海老無能

蘭堂上人之金陵因寄憲府張使君

初平牧羊處白石及秋登挂錫月中到禪房雲上曾使
君持玉節老客望金陵想見雙溪水先霜早已冰

送賈西伯

西風苜蓿花南客又移家此道寧無用吾生未有涯峰
青宜霧日潮白逆江沙猶憶南樓夜吹簫度歲華

送王伯庸赴石埭校官

先生官已冷地僻冷於官座席嵐歸潤琴壇月過寒奇
峰花作朶幽瀨玉為湍所喜無迎送高吟倚碧澗

郭生生子

歌愛誇頭玉怜應過掌珠河東真小鳳冀北定名駒英
物須啼看先生要醉扶老夫無重大折簡便當呼

東華門觀百寮待朝

陳肅伯將

重城流月影飛關動霞光度柳分龍隊穿花列鴈行珮

連都尉粉衣染令君香忽聽傳呼永催班入建章

恩制寒食賜百僚宴罷遂幸長公主宅

桃花明玉澗柳葉暗金堤綠錦呈調馬朱絲表鬪鷄筵
開同日永樂奏與雲齊更問平陽第還過小苑西

答張翰林扈駕還京

羽林環紫蓋玄武颯黃旗大校長楊獵重修好時祠雲
生三秀草風動萬年枝想得張供奉還多應詔詩

聞康給事禁中寓直因寄

重慚長樂注曲館建章通戶裏金仙露窗含玉女風濃
香千緒重華燭五文虹顧此清宵興遙怜誰與同

送浦御史往荆南

悵望荆南道飄然忽去羣雲隨驄馬色花學繡衣紋過
峽思神女逢灘問使君王程歸有限應未落春分

寄上元韓少府

借問為仙吏幽懷定若何江聲雲外急山色雨餘多小
市金陵酒遺宮玉樹歌好乘巴馬子閒踏落花過

寄柯博士

吳克恭寅夫

柯侯五雲吏自號丹丘生先皇御宸極高閣詠文明羽
蓋橋山集彩舟江上行蘇州韋刺史那獨擅才名

三月十日與薩天錫錄事遊京口城南小寺忽
虞伯生祕監寄薩詩用韵呈席上

不見祕書久憶公清且閒看詩野殿側把酒春林間因
送碧鵝使相過黃鶴山遙怜西閣侍文采映珊珊

寄薩天錫時居福建憲幕

春日江南郡懷人杜若生烏啼建業樹客在福州城桂
酒銀壺重華裾玉珮清題詩幕中罷應得動高情

寄題剪韭亭

園有幽亭趣題之剪韭名老夫無長物上客總高情脆
碧含風斷輕黃帶雨烹相過乳餅白還愛酒壺清

題李伯時畫馬

柯九思敬仲

聞說龍眠畫魯師十二閑桃花晴泛水苜蓿曉連山蹴
月馳周道嘶雲入楚關驍騰萬里志顧影落人間

送秘書掾李道濟之峽州知事

館閣論交久都門出餞遲同為遊宦客忍賦送行詩蜀道傳鸚鵡江亭叫子規地偏公事少峽外看舟移

送峽州學正

鄭元祐明德

夜雨西陵樹春風至喜亭學宮資裁正士類仰儀刑天際開三峽人心繫六經哀猿月中嘯莫作異鄉聽

送張養晦

潘純子素

寂寞麒麟閣浮沉雁鷺行已聞書上考應不負前王古

井宮槐冷空山海檜長歸心似潮水日日問錢塘

題劉高州國初運糧文卷後

帝室經營始高州積運多猶存數紙在已是百年過勲業麒麟閣英雄勅勒歌漢廷功第一只合數蕭何

送杜元甫赴南臺掾

故國江山在行臺北望優顧瞻烏亦好却憶鳳曾遊寺影清河曉蟬聲玉樹秋郎官多古意莫上最高樓

山行即事

石子路三义居人八九家綠分隣寺竹紅出短籬花野
老能娛客山泉自煮茶茜裙誰氏女赤脚髻雙丫

題豫章楊季子水北山房

舊聞楊季子水北在山房竹色長年綠松陰六月涼雨
絲深釣渚風帙亂書床亦欲相從去江波不可航

寄王仲叔

陳方子貞

陌上誰家子行春竝騎來揮鞭不相問回顧復疑猜二
月初消雪東風尚落梅更尋禪寂地石上翫蒼苔

次許廷佐喜見寺樓詩

張憲思廉

高樓名喜見遠客獨傷心
鞍馬思劉備衣冠惜華歆
曙光浮海閣秋色到江深
送目闌干久冥鴻入窅沈

雪

郭翼義仲

漠漠年華晚霏霏夜色分
江明非借月樹重或兼雲
始訝花驚陣翻愁鶴失羣
梁園詞賦客飄泊獨懷君

和東禪悅堂遣興韻

讀經香滿室燕坐自朝曛
鳥啄生臺飯龍吞洗鉢雲
心

花幽處現天籟靜中間汨汨紅塵海虛空念不分

寒林

雪落黃泥坂江空米石磯老龍寒卧蟄栖鵲夜驚飛
籟無時息漁樵落日稀明年春色裏還此看林霏

合溪別業和顧玉山韻

鷄犬秦人宅迢迢隔戰氛桃花浮釣艇草閣散鷗羣
碧樹重溪合斜陽遠笛聞吟詩雲半席遙想與誰分

寄雙徑主者

問信維摩詰山中一錫歸遙瞻雙逕月長照五銖衣寶
樹交珠網香雲護碧扉虎溪溪上路來往且忘機

新雁

江上聞新雁秋風第一聲幾行雲接塞昨夜月臨城萬
里驚烽火羣飛憶弟兄關山書未寄愁感異鄉情

寄郭義仲

鄭東季明

憶君持酒別初月出東城溪艇幾時到春潮日夜生白
沙眠翡翠青竹下鷓鴣遙想汪徵士題詩慰逸情

題余生山居

野水流花澗春雲暎草亭地連桐柏觀人識少微星養
鶴還知相煎茶亦著經卜隣應未晚休勒北山銘

贈呂一相者

男子始墮地百年那可量買臣歸作郡顏駟老為郎得
路青雲裏垂綸野水傍持盃勸君飲吾意正茫茫

谷口

鄭韶九成

谷口大星稀蒼茫夜景微草驚知鹿過潭響覺龍歸楚

舞時相狎商歌自攬衣
鹿門應有待莫遣壯心違

病起書事

病起秋水拂衣塵
土間鷄鳴帶星出
月黑騎馬還旌節
黃龍塞羽書
青草灣征人在
萬里風雪髻毛斑

寄楊團練君濟

楊基孟載

海嶼通村險邊城
去敵遙旗燈秋寨雨
鈴柝夜溝潮士飽
爭投石農間教舞
箭無令廢收穫隴
上有枯苗

夏夜有懷二首

重露澄秋色輕風生夜涼
碧看湖草亂紅愛渚蓮香
有弟徒相憶何人不異鄉
悲笳在城上雙淚落衣裳

西月離東井黃雲近紫微
秦州今日亂漢使幾時回
故舊皆朱紱風塵只素衣
流螢念孤寂相照入疎幃

召命因母老夜宿嘉禾

孫華元實

歲晚離家客更深
上水舡犬鳴營柝外
漁唱驛燈前
遠役關慈母孤忠仗
老天極知朱紱貴
無奈彩衣妍

漢使徵求急潘輿定省貧
小人猶有母率土莫非臣
歲

儉盤炊玉家貧酒泛銀自憂綠白髮豈敢逆龍鱗

送李徵君訪王司丞

倪瓚元鎮

何處尋狂客故人王子猷花
落庭前樹風吹溪上舟紫
筍生春雨綠蘋滿芳洲心
隨酒舫發悵望不能休

贈義興墨生

生住荆溪上桐花收夕烟墨
成羣玉秘囊售百金傳孰
謂奚珪勝徒稱潘谷仙老
松端愧汝桐法更精研

張心遠訪鄭九成因書以寄

州府今為掾風埃多厚顏香芹渾滿澗去鶴未巢山思
逐春雲亂心隨野水閒張君應話我樗散碧岩間

宴聽雪齋分韻得飛字

于立彥成

暮雪密成圍寒侵酒力微度窗聞暗響投隙見斜飛漸
覺明書幌時來近舞衣酣歌過午夜香靄正霏霏

簡報國寺僧清遠

邵思文文彥

聞說招提境空山紫翠中法王新象馭天子舊龍宮愛
酒慙陶令能詩憶遠公欲尋方丈室相續晉賢風

浙江亭

極目錢塘上千峰列畫屏雨晴江樹碧潮落海門青對
景悲王導移家憶管寧臨風一惆悵沽酒慰飄零

和韻送于彥成歸越

瞿榮智惠夫

匡山于外史上越有歸舟久負江湖客寧為歲月留瓊
書天上鶴淶水鏡中鷗一曲真幽絕當追賀老遊

輓穆爾古蘇

董章士明

丈夫寧制敵元帥豈容大白髮難忘母丹心只為君虎

狼千里戰吳越半江分落日孤城在忠良死後聞

次友人韻

唐室何多難詩愁杜拾遺皇天終厭亂聖德本無虧自
比當年事空懷故國悲一般思弟妹不在漢鍾離

秋興

憂國三千里思家五七年白雲南去越黃道北歸燕志
士懷經濟生靈若倒懸邊廷今日將誰畫上凌烟

送丁希元侍母舅北上

屠彝彥德

白壁連城價明珠照乘光才名推舅氏文采見諸郎柳
色迷長樂鶯聲滿建章知君能獻賦官硯發天香

暢上人文溪別業

文暢青蓮客回溪別業開南山當驃騎東海極蓬萊空
境思懸錫中流且度盃相尋多法侶冉冉下天台

仇仁父解秩建康有新文曰金淵集

老去陶元亮歸來向子平鄉闕成久別故舊喜相迎卜
宅來江燕移尊笑海鯨新傳浣花句未怪作金聲

憶舊遊

王逢原吉

醉酒高陽里題詩左氏莊
碧雲垂草帶紅旭散花房
流水循除活飛絲拂鬢長
座中誰潦倒遺却紫香囊

簡任子良縣尹

儒雅南陵尹歸吳賦遂初
畫傳韓幹馬羹煮季鷹魚柳
暗凝香閣花交織翠裾
能令兩童子為我導行車

仙茅塢

夜宿仙茅塢金鰲湧亂山
天風來海外烟火落人間
白

石思同煮青蘿喜獨攀
締衣弄華月公子亦忘還

韓蘄王墓

道過韓王墓停驂淚滿巾
中興無輔相恢復有勲臣
碑冷靈岩月山還古寺春
雲初尚詩禮時薦碧溪蘋

題畢天池道士太霞樓

畢卓太霞樓霜晴錦樹稠
天光開日觀海色動昆丘
織女機橫夜仙人座對秋
時將玉尺八醉擁翠雲裘

乾坤清氣卷十三

欽定四庫全書

乾坤清氣卷十四

明 偶桓 編

五言長律

元日朝賀

趙孟頫子昂

闔闔曙光生
觚稜瑞氣橫
治朝春有象
嚴蹕物無聲
簫笏千官列
簫韶九奏成
彤墀簇仙仗
翠樹拂霓旌
絕域梯航至
遐方玉帛盈
皇圖天遠大
聖德日高明
兵息知

仁布民熙見化行耄倪齊鼓舞率土共昇平

正月十一日朝回即事

虞集伯生

宮樹春陰合霓旌拂曙來天光臨閣道雲氣轉蓬萊
晝漏沈沈鼓晨尊灑灑盃香霏簾底霧樂殷殿前雷
祥瑞儀曹奏珍淳尚食催舞庭分鷺序効獻過龍媒
融雪微生草輕風不動埃老人南極至王母上方回
玉色何多喜金華得重陪裁詩賀新雨西閣待門開

送南宮舍人趙子期宣詔交趾

三年頒正朔五月向南交將命方離關陪臣已在郊衣
裳鴻羽漸干戚虎皮包瘴霧衝風散瀧湍急雨捎朱鳶
窺土室白雉下槽巢夜浦鮫停織陽岡荔折苞初筵紛
氍毹後騎列笳鏡諏日修王貢兼時眠客庖方言書仄
理海錯藉菁茅漢柱苔侵篆秦林樹拂旃括囊無蕘苾
當戶有蟪蛄即見還英節毋煩筮六爻

贈李兄提舉之官豫章

范梈德機

公孫閣下士多似魯諸生昨者聞高誼茲行起盛名文

亭南斗近征旆北風輕余亦懷鄉郡今猶滯帝城關河
驚半面霰雪念孤征芳宴絲簧咽新詩錦繡成長途心
果怯令節眼增明渺渺飢鷹度磬磬旅鶻鳴露凝秋浦
白雲散夕堂清是物關流動何堦計合并會須紫桂楫
相共吸尊羹徐孺亭前水因之幸寄聲

贈翰林宅山水圖

敏絕丹青手驅馳翰墨場力能移地軸藝直破天荒素
壁清風起蒼厓旭日光喬林支混沌巨石偃滄浪鶴背

芙蓉影牛頭薜荔香參差殊不謬奔峭亦非常仙去遺
真館人來倚釣航向知萬里近不費一生忙擬乞丹砂
洞長尋碧草鄉松喬如可及結友更何方

題桃源圖龍虎山南者 揭傒斯曼碩

桃源非一處龍虎畫難同內外關踰鉄高低石作叢黃
幡青劒北紫蓋白雲東蟾影當霄迴蛾眉抱月弓千重
藏曲折四面削虛空地戶吟風黑天池浴日紅雪霜翻濺
瀑雷雨瀉崩洪暗識猿啼遠晴聞鳥語工危龕三井秘絕

澗九橋通江合仙岩怒山連鬼谷雄劉王開闢後秦晉
有無中時見看桃侶頻逢採藥翁丹臺寒漠漠琳宇氣
熊熊濟勝非無具緣源恐莫窮烟霞俄變滅草樹杳龍
葱四序何勞誌羣愚倘擊蒙誰言武陵近十里上清宮

贈周景遠學士

楊載仲弘

朔易回元氣人才起俊流聲華當翰苑文彩冠中州振
佩趨臺閣抽毫侍冕旒人傳鸚鵡賦家有鸛鶴裘式覩
黌宮立恭惟祀典修一朝虞或缺六器俾旁求俎豆俄

成列蘋繁遂可羞中朝方有道下士實同休已及歸鴻
候姑為食蟹謀朋簪多繾綣使節少淹留曉日花間酒
春風柳下舟篇章微品藻山水愧清幽鄭璞曾先辱隋
珠不暗投考槃雖自引闕觀亦吾憂簡冊銷長日蓬蒿
憚凜秋論高非縱誕興遠托賡酬尚憶駒千里胡能貉
一丘何當把君袂相逐馭風遊

寄王繼學二十韻

聖主敷皇極元臣建上台虛心求俊乂削跡去奸回拜命

超凡品知君秉大才淳風隨日播公道應時開負鼎資烹飪
操刀貴剗裁銛鋒行肯綮異味合鹽梅廟議常參決朝班復
共陪艱難須飲詒達遠嫌猜遺佚聞風起英雄接踵來
經綸非董賈詞藻亦鄒枚在野思羅致盈庭想轂推既將
龍作友惡假鴟為媒走也今留此公乎可念哉執竿猶海
上扶耒即岩隈自守幽人意寧虞俗子吟舊遊辭玉府故
事憶金臺落魄江湖阻蒼茫歲月催丹心徒耿介素髮已
毵毵勿謂交如水能忘恥及壘飛黃當駕馭猶足異駑駘

贈黃伯中從臨川吳先生卒業因之奉簡

柳貫道傳

天子祠垣舊巴山關里門具瞻誰可竝
友愛益宜尊往卒諸生業行穿百谷
村亂流黃濁湧迎宿綠陰繁想到趨
函丈承聞服緒言心將經義洽理竝
聖詮存藻績終迷質條枝實自根
須無遵近輓會有企前轅伊闕如堪
攬河汾欲併吞道初由已致舌豈要
人捫正要薰陶學全希笑色溫歸裝
當捆載館饋且盤飧羨爾方朝旭慙

予未夕昏仰懷駒皎皎深感兔爰爰搖席今承問緘辭莫憚
煩庶幾薦鳳觚兼得嗜熊蹯何勞祝因茲寄不諼

上執政四十韻

雅勒呼正卿

聖主飛龍日求賢似拾珍典謨皆故老登用必元臣日
月當黃道風雲擁紫宸華封歸帝力壽域囿吾民旭旭
時將旦熙熙物自春唐虞風未遠鄒魯俗還淳往者三
靈墜扶持賴有人斬鯨清海沸煉石補天述工鯨趨刑
辟臯夔起隱淪明公辭政久首詔趣裝頻渴慰蒼生望

饑伶赤子貧朝陽先覩鳳春籟正書麟總代天成化俱
為政入神五朝居輔弼三世掌經綸皇眷恩波濶玄功
德澤均房謀兼杜斷蕭律繼曹遵厯法義經秘書文韻
篆新山河由秉筆社稷在垂紳衆水宗南渤諸星拱北
辰濟為舟楫重任託股肱親玉燭調元氣金樞運大鈞
都俞聞密贊諫論喜重陳聲教流沙外謳歌碣石濱烏
臺分繡斧鳳沼繼華茵練達時無匹公忠世絕倫棟梁
支大厦柱石表重閭天下皆桃李人間盡棘榛中台方

正席東閣又延賓有客懷吾道無媒致此身窮經甘寂寞抱拙忍酸辛虎榜叨前列鴛墀接後塵郎潛嗟咄咄吏隱嘆逡逡十口長為旅三年屢卜隣稻粱猶不足抱負豈能伸養母留甘旨居官守誨諄正言期董賈枉道恥儀秦草芥難終棄芻蕘尚可詢修途多駿足汙轍有潛鱗未遂風雲信猶沾雨露仁天瓢能一滴咫尺是通津

寄李冉

黃潛晉卿

有美維仙李孤標見碧梧高雲留雨露短褐混泥塗安
悍寧為小機深或類愚洗心須貝葉游藝及擣菹政爾
難藏穎幡然獨缺竽從容觀近效黽勉事難趨稍廢琴
心曲能操犢背書誰將窮罔象莫使避珊瑚他日逢何
暮清談動至晡醉醒勞問我喜怒得今渠契濶江湖迥
飄零歲月徂青雲悲捷徑白日仰亨衢秋社粉榆外南
包橘柚初飛騰如借順能勿哭蟾蜍

題趙子昂詩卷三十韻

柯九思敬仲

江漢龍舫下東南王氣收求賢垂睿畧為治訪嘉猷使
者班纁幣王孫覲冕旒未央凝掌露東序薦天球顥氣
凌風上祥光近日浮看花陪雉尾視草近螭頭清曉還
聞履嚴寒或賜裘宋公周有客項伯漢諸侯人仰文章
貴身承禮數優五朝通內籍九命擅清流昔滯京都久
時從几杖遊通家怜我慧對酒慰羈愁妙墨時相贈新
篇不厭酬風流追鮑謝文彩駕枚鄒心慕歸來好官因
老欲休倚闌秋待月攜客煖經丘歌罷聞啼鳥機忘玩

狎鷗茗溪今寂寂松雪自悠悠馬鬣遺封在龍驤待詔
不斷縑人共賞隻字世爭售揮翰能兼美評量此莫儔
調高鏘玉管筆健映銀鈎江海蒼烟暮湖山碧樹秋賈
充能誤國王粲謾登樓花落渾無賴春歸不自由蜀牋
臨別墅英穎勝他州揮洒真成癖吟哦可解憂鍾王多
韵度李杜極深幽入室能攀踐超隅恨阻修錦標連玉
軸把卷共綢繆

寄王祕書

王沂師魯

佳士欣相識吾宗不乏賢
齋房芝曄曄太液鵲翩翩
得意同濠上論文到漢前
偶因諧陸鐸直欲斲龍泉
我已輕平子君何念伏虔
未成臨鍛竈且復寄漁舡
跡忝乘槎客心疑化鶴仙
長歌洞簫賦好寄角弓篇
丘壑終忘返泥塗肯自怜
別來南菊再信斷北魚傳
豹隱千峰雨鴻飛一握天
吳江元自白燕月幾回圓
阮籍能忘飯揚雄解草玄
風標勞夢想秋色正澄鮮
欲問支機石空畊種玉田
遙遙望銀浦應與鳳城連

翰苑薦為應奉文字二十韻謝大司徒并呈諸
學士

天上金鑾客人間第一流
贊名唐內相禹拜漢光侯
鯤海三千水龜峯十二樓
月寒紅燭夜風淡紫微秋
鳳詔窺姚姒麟篇振魯鄒
珮隨宮漏遠衣染御烟浮
淑氣騰奎壁祥光射斗牛
焜煌青瑣闥縹緲紫霞洲
瑪瑙濡堯瓮珊瑚耀漢鉤
馳蹄中禁奎豹尾尚方騶
僕本師黃卷生惟伴白鷗
親庭雙鶴髮家事一漁舟
偶預天官選來

為帝里遊綠章蒙獨薦青史許同修故郡驚王勃新豐
異馬周隊隨魚圉圉角喜鹿呦呦勢似飛三鳳功如挽
萬牛桑榆終有望葑菲未為愁國士恩難報書生志未
酬誓堅冰雪操五色贊皇猷

送葉天根南還

陳旅衆仲

我識天根子于今二十年吹簫來翠嶺鼓櫂入丹淵日
出扶桑底雲生建木顛人間方夜半海上得春先老我
江湖迥徵官歲月遷荒泉流竹里冷雨浸芝田髮短何

為者君歸重惘然飛霞浮夕景定在石林邊

南山詩

山在龍虎山南張宗師藏劍之地曰丹丘有
小洞門玉津澗月橋天鑑池金沙井躍雪泉
漱雲亭山雲閣丹桂塢桃花源云

江左羣山囿仙丘倚太霞上清分亢爽南谷抱谿訶臺
觀黃瓊宅林巒赤虎家天池開寶鑑日井射金沙桂實
秋岩栗桃烘曉岸葩泉香通美竹雲液漱靈芽俯澗松

偏潤緣崖徑自斜幽亭宜水遶晴閣喜嵐遮神烏丹局
秘玄關紫氣賒石橋留月色銀浦渺星華願解延陵劍
終乘博望槎臨風一邂逅食我棗如瓜

陪幸西湖

台哈布哈兼善

北都冠蓋地西郭水雲鄉珠樹三花放鸞旗五色翔雞
翹輦鳳渚豹尾殿龍驤駕擁千官仗帆開百尺檣屬車
陪後乘清道肅前行河漢元通海湖山遠勝抗經綸屬
姚宋制作從班揚瑞繞金根動聲搖玉珮鏘春陰飛土

雨曉露挹天漿御柳枝枝綠仙葩處處香葵傾惟日向
荷偃借風張寶馬鳴沙路華舟迴石塘金吾分禁籞武
衛四屯箱小大濡深澤仁明發正陽皇皇星斗濶落落
股肱良朝野崇無逸邦家重有光賜租寬下國傳詔出
中堂布政親巡省觀民或怠荒麥禾連野迴桑柘出林
長樂歲天顏喜回鑒月下廊

送達兼善典僉

傅若金與礪

聖治尊儒術賢才翼帝躬立朝防觸虜行路避乘驄復

道河南去先愁冀北空激揚元自任出處豈謀同地遠
看持節天長惜轉蓬繡衣今日把尺素幾時通別酒花
開裏征帆木落中薊門懸夜月梁苑度秋風古縣藤蘿
碧霜林菓蓀紅咨詢行每徧閒暇賦能工白日明高岳
黃河繞故宮登臨興何限題寄北飛鴻

題索士岩詩卷

薩都拉天錫

憶昔登天府文章萃帝鄉俊才魚貫列多士鴈成行寶
鑑懸秋水驪珠耿夜光三場如拾芥一箭已穿楊上策

師周孔蜚聲陋漢唐鳳池開御宴虎榜出宮牆賜笏丘
山重恩袍雨露香天花皆剪翠法酒盡封黃冠蓋遊三
日聲名滿四方歷階超宰輔捧表謝君王第甲分三級
名碑勒上庠曲江嘉宴會合席盡才良契誼同昆弟比
和鼓瑟簧誓辭猶在耳離思各驚腸弟出丹陽郡君登
白玉堂雄文超賈董直筆走班揚臺閣需才器儒林作
棟梁超遷烏府掾輝映繡衣郎迫宴封機事平明出奏
章日披文典舊時念簿書忙檢討趨經幄論思近御床

聖朝稽古道日昃下迴廊羈旅燃薪桂長吟出錦坊弱
妻貧且病羸馬瘦仍僵窮巷迴車轍空厨乏酒漿故人
傳奏日請使促行裝皇極三臺重燕南各道張承恩辭
魏闢攬轡入衡陽曉幕芙蓉露秋空栢樹霜諸司循直
矢羣吏肅宏綱漢水浮神馬岐山出鳳凰行須冠獬豸
已見走豺狼慚愧蓬蒿翼乘風亦下翔

上京大宴和樊時中韻

貢師泰泰甫

一元開大統四海會時髦畿甸包幽薊天門啟應臯羣

黎皆屬望百辟盡勤勞蕃國來琛獻邊陲絕驛騷劍韜
龍尾匣弓屬虎皮索列聖尊皇極元臣異節旄宗盟存
帶礪世胄出英豪歲駕嚴先蹕居人望左纛平沙班詐
馬別殿燕宗毛鳳簇珍珠帽龍盤錦繡袍扇分雲母薄
屏晃水晶高馬湏浮犀碗駝峯落寶刀暖茵攢芍藥涼
甕酌蒲萄舞轉星河影歌騰陸海濤齊聲纔起和頓足
復分曹急管催瑤席繁絃壓紫槽明良真曠遇熙洽喜
重遭化類工成冶聲同士赴磬隆恩雖款洽醉舞敢呼

號拜命榮三錫論功恥二桃重華躋舜禹盛業繼夔咎
燕饗存寅畏游畋戒逸遨乾坤春拍拍宇宙樂陶陶爭
獻公車頌光榮勝袞褒

元日靈臺官以初四日巳酉時享遂以歲除日
受誓于中書免朝紀詩八韻 張翥仲舉

清廟當春享彤庭放早朝扈鳴更歷正龍集轉寅杓瑞
日開黃道卿雲映絳霄八方周象譯九奏舜簫韶爐煖
香生术杯紅酒泛椒新符鬱壘換候琯女夷調有待寬

書下行看戰甲銷
衰年今可引歸老故山樵

送廉公亮僉事江西

李孝光季和

除書下北闕使牡指南州
暫輟紫霄顧遙瞻畫閣秋
官清持玉節天近見珠旒
報政民安作聞謠雨不愁
梅花當路發月影入江流
定有登高賦應將勝日酬

吳山清暉亭與坦之仲舉聯句

張天雨伯雨

吳山秋色裏

坦

倚石望滄江日脚霞侵戶
濤頭雪濺窗

雨浪

奔沙岸疊

翦

山夾海門雙

坦

有客愁新隱

雨

于茲感舊邦

坦

憑高乘險絕懷古點紛龐

翦

雜沓書連屋淋漓酒滿缸

雨

聯

詩搜月窟

坦

擘阮瀉岳淙

翦

龜殼冠將墮

雨

龍文鼎可扛頗

諧幽事熟

坦

未覺壯心降

翦

滿月孤金柱

雨

叢筠亂碧幢

坦

晴峯俄默默夕磬已攄攄

翦

歸路風塵表酬歌不用腔

雨

送留文美知事赴燕南

釋大訢笑隱

江陵初扈蹕忠義可回天
代邸朱虛重南陽鄧禹賢
揮毫當白日舞劒動華筵
宮錦紅雲暖金盤玉露圓
古來

三語掾今代孝廉舡無薄燕南幕相期日九遷

金陵奉餞趙公子去疾理問侍平章魯公世延

入蜀歸秦次龍翔大中韻 丁復仲容

平章向三峽公子奉雙親祖帳聯裾盛官舡發棹新屋
墩誰較謝宮井自餘陳劔閣當西極刀州遠北辰魯公
加上爵趙氏游名臣死節褒賢嗣生榮溢老身渚風開
鷗尾江日湧龍鱗夾岸觀如堵中流望若神埋金陵樹
遠濯錦水花勻前纛仍踰蜀先墳宛在秦布帆知到日

繡斧拜新春亦有羅貔虎無非聚鳳麟
川將天作限山入海為濱從騎遙通棧
安車緩度輪晨調珍翠釜夕待晏文茵
雛弄娛依坐鷄鳴服伺隣所期長壽考
莫或後嘉賓倘有星回使惟應日問人

和許集賢春夜寓直

陳肅伯將

通籍趨香署分曹隸瑣闌金泥疏奏簡
珠檢蘊朝衣竹靜憐鐘迴花深覺漏微
絳河低綺綴紺斗入羅帷薄夢先鷄發
閒情信馬歸幸因披艷藻謬用接清輝

送董副樞鎮益都

推轂選才雄分符寄摠戎
饒簫驚海上旌節耀山東
百將乘黃道三軍出絳宮
營開知偃月陣轉識偏風
龍躍蓮花劍烏號棘竹弓
旄頭天苑斃鑿齒地隅空
奏凱青春外飛書白晝中
誰當米金石願紀太平功

送戶部員外郎張君師允銓選于立彥成

聖主當陽宇文星冠甲科
經綸彌宇宙帶礪誓山河
荆楚藩屏大番禹職貢多
銓衡須遴選郎署得逶迤
風拜

天書寵俄聞使節過後塵雲擁騎前隊鼓鳴鼙五領初
消瘴三江漸息波柴桑訪遺逸廬阜入吟哦地遠雲雙
翼天空海一蠡庭闌情最切鼎鼐味應和還直青綾被
重鳴白玉珂歸來宣室夜前席問如何

六言

黃清夫秋江釣月圖

趙孟頫子昂

塵土染人衣袂烟波著我船窗為問行歌都市何如釣
月秋江

孤山放鶴圖

昔年曾到孤山蒼藤古木高寒想見先生風致畫圖留
與人看

題王子慶所藏大年墨鴈

鴻鴈棲棲遵渚黃蘆索索鳴秋羨殺承平公子筆端萬
里滄洲

題江山烟雨圖

虞集伯生

千村春水方生萬里歸帆如羽不知誰在層樓卧看江

南烟雨

柯博士竹樹古石

江潭木葉盡落巫峽竹枝更長剪取微風疎雨橫吹殘
月清霜

石帶苔而蒼翠竹垂雨以珠璣藉玉五紋之組析旌六
羽之翬

趙承旨蘭石溫日觀葡萄

天人漱凍芳潤野老沉吟屈蟠南國烟生玉煖西涼酒

熟霜寒

趙承旨畫松

洒霏烟之餘馨見蒼龍之一體森紫髯之如戟激清風而直指

題聶空山畫扇

客來山雨鳴澗客去山翁醉眠花外春雲藹藹竹邊秋月娟娟

題王孤雲界畫山水

柯九思敬仲

滿地山河如繡迴巖樓閣凌風幾度春花秋雨不知秦
苑吳宮

過何得之先生故居

揭傒斯曼碩

可憐古井門外依舊鐘樓屋西何處高吟痛飲黃花翠
竹都迷

心事巢由以上文章陶阮之間千古高墳保下白雲明
月青山

頭上烏紗分贈篋中縞楮相酬不道別時長別誰知愁

是真愁

屋上青天未老門前白日常新他日咎獲稷高安知不
是斯人

題雲林畫

張天雨伯雨

歷歷溪山欲暝離離草樹長春風雨綠蓑歸去苔磯一
向無人

雜咏三首

郭翼義仲

一卷北窗周易五絃南風舜琴自是無心富貴從教遁

跡山林

仙人杏花滿樹處
士楊柳當門白髮烏
紗碁局綠水青
山酒尊

朝汲橘泉丹井莫耕蕙圃芝
田疇後長生有訣一笑曾
許相傳

鸚鵡

瀛國公

毛羽自然可數仙
禽不受凡籠銜得梧桐一葉中含無
限秋風



乾坤清氣卷十四